

Sanaartorneq pillugu Inatsisartut inatsisaat pillugu Namminersorlutik Oqartussat nalunaarutaat

Matumuuna nalunaarutigineqarput Sanaartorneq pillugu Inatsisartut inatsisaat nr. 13, 26. maaji 2010-meersaq, allannguutit ukunani pineqartut ilanngullugit Inatsisartut inatsisaat nr. 29, 13. Juuni 2023-meersaq.

Kapitali 1

Inatsimmi siunertaasut atuuffissaalu

§ 1. Inatsisartut inatsisaata siunertarivaa:

- 1) sanaartukkat ikuallattoornissaq, isumannaallisaaneq peqqinnissarlu eqqarsaatigalugit naammaginartumik toqqissisimanartunngorlugit sananeqarnissaasa ilusilernerneqarnissaasalu qulakkeerneqarnissaa,
- 2) sanaartukkat nunaminertallu sanaartorfunngitsut sanaartukkanut atasut atuinnissamut siunnerfigineqartoq eqqarsaatigalugu naammaginartumik pitsaassuseqalernissaasa aammalu illersorsinnaasumik aserfallatsaaliorneqarnissaasa qulakkeerneqarnissaa,
- 3) sanaartukkat innarluutilinnut atoruminartunngorlugit ilusilersorneqartarnerisa siuarsarneqarnissaa,
- 4) sanaartukkat ilusilersorneqarnermikkut pitsaassusiisa siuarsarneqarnissaat,
- 5) iliuusissat, sanaartukkani isumalluutini pisariaqanngitsumik atuinnissamut pinaveersaarutaasussat siuarsarneqarnissaat,
- 6) sanaartukkani atortut avatangiisinut ajoqutaanngitsut atorneqartarnerisa siuarsarneqarnissaat, kiisalu
- 7) illuutitut inissianullu tunngasut ataqatigiisumik nalunaarsorneqartarnissaasa aqutissiuunneqarnissaa qulakkiissallugu.

§ 2. Inatsisartut inatsisaat atorneqassaaq:

- 1) nutaamik sanaartornermi, sanaartukkamillu alliliinermi,
- 2) inatsimmi aalajangersakkanut imaluunniit inatsit naapertorlugu aalajangersagaliarineqartunut naleqqiullugu sanaartukkami annertuumik allanngortiterinermi allatigullu allannguinermi,
- 3) inatsimmi aalajangersakkanut imaluunniit inatsit naapertorlugu aalajangersagaliarineqartunut naleqqiullugu sanaartukkap atorneqarneranik annertuumik allannguinermi,
- 4) sanaartukkamik ingutserinermi kiisalu
- 5) sanaartukkami nukimmik atuinnermut sunniuteqartussaalluni sanaartukkamik piusumik aserfallatsaaliuinermi, allanngortiterinermi allatigullu allannguinermi.

Imm. 2. Sanaartukkat tassaapput illut aammalu ilusilersukkat aalaakkaasut sanaartukkallu allat, inatsisip ilusilersukkanut aalaakkaasunut sanaartukkanullu atorineqarnerani inatsimmi isumagineqartussatut siunnerfigineqartussatut eqqarsaatigineqartunik tunngaveqarpata.

Imm. 3. Inatsimmi pineqartut tassaapput sanaartukkat, sanaartukkat qanga sananeqarsimanerat apeqqutaatinnagu aalajangersakkat ataasiakkaat imarisaanni tamatumunnga ersarissumik tunngaviliisoqarsimappat.

§ 3. Inatsit manna aamma inatsit naapertorlugu aalajangersagaliaasut sanaartukkanut aalajangersimasunik ilusilinnut atuutissanngitsut imaluunniit ilaannaasumik atuutissasut illuliornermi malittarisassani aalajangerneqarsinnaavoq, tak. § 5. Tassani assersuutigalugu pineqarput ikaartarfiit, sulluliat, angallannermi sanaartukkat aamma imeqarfiit il.il.

Kapitali 2

Sanaartukkat aamma nunaminertat sanaartorfunngitsut sanaartukkamut atasut suliarineqarnissaannut, ilusilerneqarnissaannut aserfallatsaaliorneqarnissaannullu piumasaqaatit

§ 4. Sanaartugaq aatsaat atorineqalersinnaavoq:

- 1) imermut eqqiluisaarnermi atoriikkamut avatangiisinik illersuinissamut inatsisimmut naapertuuttumik kuuffiliisoqarpat igitsinissamulluunniit aaqqissuussisoqarpat,
- 2) imermik pilersuinermit inatsimmut naapertuuttumik imermik imigassamik pilersuisoqalerpat, kiisalu
- 3) upalungaarsimanermut ikuallattoornissamullu inatsimmut naapertuuttumik qatserisinnaanermut isumannaatsumik periarfissaqalerpat.

Imm. 2. Sanaartornerup aallartinneqannginnerani imm. 1-imi piumasaqaatit naammassineqarsimanngippata, sanaartukkap atorineqalinnginnerani suliasat suliarineqarnissaannut qularnaveeqqusiinissaq kommunalbestyrelsip piumasarisinnaavaa.

§ 5. Illuliornermi malittarisassanik Naalakkersuisut aalajangersaassapput, tassanilu maleruagassat inatsit manna malillugu aalajangersarneqassapput.

§ 6. Illuliornermi malittarisassani sanaartukkat sananeqarnerinut ilusilersorneqarnerinullu maleruagassanik aalajangersaasoqarsinnaavoq, makku eqqarsaatigalugit:

- 1) isumannaallisaanissaq, ikuallattoornissaq peqqinnissarlu eqqarsaatigalugit isumagineqartussat,
- 2) teknikkimut atortulersuutit suliarineqarnissaat, tassunga ilaatinneqarlutik aalajangersakkat eqqiluisaarnermut teknikkimullu atortunik, kiisalu innarluutilinnut teknikkikkut ikiorsiissutinik aalaakkaasunik kingusinnerusukkut ikkussuisinnaanermut periarfissiisut,
- 3) atuinissaq siunnerfigineqartoq eqqarsaatigalugu sanaartukkat najugaqarfissat naleqquttumik ilusilersorneqarnissaat,
- 4) sanaartukkat inunnit innarluutilinnit atorineqarsinnaasunngorlugit sanaartukkanik kiisalu sananeqaatinik atortunillu aalaakkaasunik ilusilersuinissaq,
- 5) anguniagassanik malitassanik, sanaartukkat sananeqaataannik, atortut sananeqaataannik pequtinillu assigiissaakkanik atuinissamut iluaqutaasunik atuinissaq,

- 6) iliuusissat, sanaartukkani pioreersuni taamatullu nutaani nukimmik pisariaqanngitsumik atuinissamut pinaveersaartitsissutaasussat,
- 7) sanaartukkat portussusissaasa annertussusissaasalu naatsorsorneqartarnerat, aammalu sanaartukkap taassumalu nunataata portussusissaannik aalajangersaasarneq,
- 8) iliuusissat, sanaartukkani pioreersuni taamatullu nutaani aatsitassanik pisariaqanngitsumik atuinissamut pinaveersaartitsissutaasussat, taakkununga atortunik sananeqaatinillu aalajangersimasunik atuinissamut, aamma atortunik atoqqiinnissamut aalajangersakkat ilaatinneqarlutik, kiisalu
- 9) iliuusissat, sanaartukkat atortulersuutaasalu ilaanni akunnaatsumik ingerlatsinissamut, aserfallatsaaliuinissamut nutarterinissamullu iluaqutaasinnaasut.

Imm. 2. Illuliornermi malittarisassani ininut suliffiusussanut maleruagassanut atatillugu, sulisut peqqissusaannut ilorrisimaarnissaannullu iliuusissat, soorlu isersimaartarfiit, nerisarfii, atisaasiviit, atisaajartarfiit, perusuersartarfiit, errorfiit uffarfillu, kiisalu sinittarfiit pequtillu suliarineqarnissaannut ilusilersorneqarnissaannullu aalajangersakkanik aalajangersaasoqassaaq.

Imm. 3. Illuliornermi malittarisassat sillimanissaq peqqinnissarlu eqqarsaatigalugit teknikkikkut atortulersuutunik ingerlatsinermut aserfallatsaaliuinissamullu maleruagassiortoqarsinnaavoq. Maleruagassat atortunut nutaanut pioreersunullu atuutissapput.

§ 7. Illuliornermi maleruagassani nunaminertat sanaartorfigineqanngitsut sanaartukkanut atasut meeqqanit inersimasunillu naammaginatsumik najorneqarsinnaasunngorlugit, aqqusinertigut qimanneqarsinnaasunngorlugit tikinneqarsinnaasunngorlugillu, qatserisartut annaassiniarnissaannut aammalu biilit uninnissaannut periarfissaqartillugit angissusissaat, atortussat ilusilersorneqarnissaallu pillugit aalajangersaasoqarsinnaavoq.

Imm. 2. Nunaminertat sanaartorfigineqanngitsut, imm. 1 naapertorlugu maleruagassiarineqartut tunngavigalugit atugassanngortinneqarsimasut akuerineqarsimasullu siunertarineqartut uniorlugit atorneqaqqusaanngillat. Sanaartukkami inatsisip atuutilernissaa sioqqullugu sananeqarsimasumi nunaminertanik sanaartorfunngitsunik, imm. 1-imi siunertatut taaneqartunik naammassinninnissamut piukkunnaatilinnik peqarpat, taakku sanaartorfigineqarnissaannut imaluunniit siunertat pineqartut uniorlugit atorneqarnissaannut kommunalbestyrelsi akerliusinnaavoq.

Imm. 3. Sumiiffimmut pilersaarummi imaluunniit kommunimi pilersaarusiornermut malittarisassani imm. 1 naapertorlugu pissutsinut aalajangersaasoqarsimatillugu, maleruagassat imm. 1 naapertorlugu aalajangersarneqarsimasut atorneqassanngillat.

§ 8. Illuliornermi malittarisassani sanaartukkat akunnerminni naammaginatsumik ungasissuseqarnissaat qaammaqqusersorneqarnissaallu qulakkeerniarlugu, sanaartukkat portussusissaat aammalu taakku aqqusinernut sanaartukkanullu saniliusunut ungasissusissaat pillugu maleruagassanik aalajangersaasoqarsinnaavoq.

Imm. 2. Sumiiffimmut pilersaarummi imaluunniit kommunimi pilersaarusiornermut malittarisassani imm. 1 naapertorlugu pissutsinut aalajangersaasoqarsimatillugu, maleruagassat imm. 1 naapertorlugu aalajangersarneqarsimasut atorneqassanngillat.

§ 9. Illuliornermi malittarisassani aalajangersakkanik sanaartukkat makkua pineqartunut ilaasimanngippata, pisuni tamani ataasiakkaani inatsisini isumagissassatut siunnerfigineqartut

eqqarsaatigalugit kommunalbestyrelsip piumasaqaatai malillugit sananeqartassapput:

- 1) Sanaartukkat inillu anginerusut pisiniarfittut, allaffittut, suliffissuurtut, sannavittut toqqorsivittullu atorneqartussat.
- 2) Oqaluffiit, isiginnaartitsisarfiit, akunnittarfiit, paaqqinnittarfiit, napparsimmaviit, perorsaaviit, sanaartukkat ilinniartitsinermik, saqqummersitsinermik nuannaariartitsinermilluunniit siunertaqarfusut, kiisalu sanaartukkat inilluunniit annerusut, inunnit amerlasuunit katersuuffigineqartartut.

§ 10. Sanaartukkat, nunaminertat sanaartorfigineqarsimanngitsut sanaartukkamut atasut aammalu taamatullu ilusilernerqarsimasut naammaginnartumik pitsaasuutinneqassapput, taamaallutillu sanaartukkami najugaqartunut allanullu uloriaanaateqassanngillat allatulluunniit annertuunik amigaateqassanatik. Sanaartukkat inissisimaffiat eqqarsaatigalugu pissusissamisoortumik pitsaassuseqartinneqarlutik aserfallatsaaliorneqassapput.

Imm. 2. Sanaartukkap qanga sananeqarsimanera apeqqutaatinnagu imm. 1-imi aalajangersagaq atuutissaaq.

§ 11. Sanaartukkani nutaani kiisalu sanaartukkani pioreersuni innaallagissamik, imermik kiassarnermillu atuinnermut immikkut uuttuusersuisoqarnissaa, kiisalu teknikkikkut atortorissaarutini siunertamut pisariaqartinneqartunik suliaqartoqarnissaa pillugu Naalakkersuisut maleruagassiorsinnaapput.

Imm. 2. Uuttuutit immikkoortut atuinnermik uuttuisarnermut tunngaviusutut atorneqassanersut, aammalu qanoq pisoqartillugu immikkut uuttuusiinissamut piumasaqaatinik saneqqutsisoqarsinnaassanersaq pillugu maleruagassanik Naalakkersuisut aalajangersaasinnaapput.

Imm. 3. Inissiami imaluunniit inuussutissarsiornermut immikkoortortami annaasaqarfusinnaasumi inissisimaffeqartumi kiassarnermik atuinnermut uuttuusiinermi, kissap annaasassap annertussusissaanut, aammalu sulianik taamaattunik suliaqarnissamut maleruagassani iluarsiiisoqassanersaq pillugu maleruagassanik Naalakkersuisut aalajangersaasinnaapput.

§ 12. Allannortiterinissamut imaluunniit allannortitsinissamut pilersaarutaasoq illuliorfiup tikikkuminassusaanut annertuumik pingaaruteqanngikkaluartoq, sanaartukkani pioreersuni allannortiterinnermut aamma allannguinnermut allanut, illuliornermi malittarisassani, tak. § 5, tikikkuminassuseq pillugu aalajangersakkat atorneqassanersut Naalakkersuisut aalajangersaasinnaapput. Taakkununga ilanngullugu suliaassap pilersaarutaasup suliarineqarneranut sanaartornermi aningaasartuutit aamma aalajangersakkat malillugit tikikkuminassusissamut pitsannguinnermut aningaasartuutit akornanni aningaasaqarnikkut ataqatigiittoqassanersaq, taamaallunilu aningaasartuutit akornanni nikingasoqalinnginnissaanut qulakkeerisoqassanersaq pillugu Naalakkersuisut aalajangersaasinnaapput.

Imm. 2. Imm.1 malillugu maleruagassat aalajangersarneqartut sanaartukkami pioreersumi imatut immikkoortinneqarsinnaapput:

- 1) Sanaartugaq tamanut ammasumik iserfigineqarsinnaasoq.
- 2) Sanaartugaq inuussutissarsiornermi allaffissiornermut sullissinermullu atorneqartoq.

Kapitali 3

Aqutsinnermut aalajangersakkat

§ 13. Suliassat § 2-mi pineqartut kommunalbestyrelsimit sananissamut akuersissummik pissarsisimatinnani aallartinneqaqqusaanngillat. Qinnuteqartup paasissutissanik qinnuteqaatip nalilersorneqarnerani pisariaqartinneqartunik tunniussinissaa pillugu kommunalbestyrelsi piumasaqarsinnaavoq. Sanaartukkamut suliami pissutsit tamarmik inaarutaasumik inissinneqanngikkaluartut sanaartugaq aallartinneqarsinnaasoq kommunalbestyrelsi naliliippat, sananissamut akuersissut immikkoortukkaarlugu agguarneqarsinnaavoq. Akuersissutip ullulernerqarneraniit ukioq ataaseq qaangiutsinnagu suliassat akuersissummi pineqartut aallartinneqarsimanngippata, akuersissut atorunnaassaaq. Sanaartugaq arlalinnik immikkoortulik aallartinneqarnerminiit ukiut marluk qaangiutsinnagit naammassineqarsinnaanngitsoq ilimagineqarpat, akuersissut suliamut immikkoortumut killilernerqassaaq.

Imm. 2. Illuliornermi malittarisassani inatsisit allat naapertorlugit qinnuteqaatigineqartumut akuersissutissatut pisariaqartinneqartut nalunaarutigineqarnissaat sioqqullugu kommunalbestyrelsip imm. 1 naapertorlugu nalunaaruteqarsinnaannginneranut aalajangersaasoqarsinnaavoq.

§ 14. Suliat § 2-mut ilaatinneqartut kommunalbestyrelsi akuersiteqqaarnagu atorneqalissanngillat. Illuliornermi malittarisassani sanaartukkat naammassivinneqanngitsut atorneqarallarnissaannut aalajangersakkanik ilanngussisoqarsinnaavoq.

§ 15. Illuliornermi malittarisassani akuersissutitut § 13, imm. 1-imi aamma § 14-imi taaneqartunut piumasaqaatinik sakkukinnerulersitsinissamut aalajangersakkanik ilanngussisoqarsinnaavoq, taakkunungalu ilaapput aalajangersakkat, sanaartukkanut aalajangersimasunik ilusilinnut piumasaqaatinik tamakkiisumik ilaannaasumilluunniit ilaatitsiviunngitsut.

§ 16. Pissutsinik, inatsimmut matumunnga aammalu inatsit naapertorlugu peqqussusiarineqartunut uniuuttunik iluarsinissaq sukkulluunniit sanaartukkamik piginnittup pisussaaffigaa. Aamma sanaartugaq inatsisit uniorlugit atorneqalerpat tamanna atuisup pisussaaffigissavaa.

Imm. 2. Piginnittoq atuisorluunniit, pissutsinik inatsisinik uniuiffiusunik iluarsinissamik kommunalbestyrelsimit peqquneqarnermini malinninngitsoq, eqqartuussivitsigut aalajangiinikkut piffissap aalajangerneqartup iluani ingerlaavartunik akiliisussanngortinneqarluni pissutsinik iluarsinissamut peqquneqarsinnaavoq. Akiliisitsissutit Nunap Karsianut tutsinneqassapput.

Imm. 3. Eqqartuussivitsigut aalajangiineq malillugu pissutsinik inatsisinik uniuiffiusunik iluarsinissamut peqqussutitut nalunaarutigineqartoq piffissaq eqqorlugu naammassineqanngippat, aammalu akiliisitsissutissanik akiliisitsiniarneq peqqussutip naammassineqarnissaanik kinguneqartussatut isumaqarfigineqanngippat, kommunalbestyrelsip pisariaqartitsineq malillugu pissutsit piginnittumut imaluunniit atuisumut akiligassanngorlugit iluarsiiiffigisinnaavai.

§ 17. Sanaartukkap amigaateqarnera pissutigalugu najugaqartunut allanullu ulorianartorsiortisoqalissappat, sanaartukkap taassumalu avataani nunaminertat pisariaqartinneqartut malillugit assersorneqassasut inuerutsinneqassasullu kommunalbestyrelsip piumasarisinnaavaa. Assersuinissamut inuerutsitsinissamullu peqqussut erngerluni naammassineqanngippat,

eqqartuussivitsigut aalajangiinikkut kommunalbestyrelsip tamanna piginnittumut akiligassanngorlugu naammassisinnaavaa.

Kapitali 3 a

Illuutini Inissianillu Nalunaarsuiffik

§ 17 a. Illuutini Inissianillu Nalunaarsuiffik:

- 1) sanaartukkanut tunngasunik, sanaartukkani inissianut tunngasunik kiisalu teknikkikkut atortuutitut il.il. tunngasunik tunngaviusunik paasissutissartaqassaaq,
- 2) illuutit qaqugukkut sanaartorneqarsimanerat apeqqutaatinnagu illuutitut tamanut, matumani inissiat inuussutissarsiorfillu kiisalu teknikkikkut atortuutit uuttuutillu il.il. nalunaarsuiffimmi nalunaarsorneqarsimasut ilanngullugit, ersarissumik nalunaarsuiffeqassaaq atortorissaarutit kiisalu
- 3) pisortani oqartussaasunut, inuinnarnut suliffeqarfinnillu paasissutissanik takunnissinnaatitsissaaq.

§ 17 b. Malittarisassat Naalakkersuisunit aalajangersarneqartut malillugit kommunip killeqarfiani Illuutini Inissianillu Nalunaarsuiffik kommunalbestyrelsip ingerlatissavaa.

Imm. 2. Illuutini inissianillu kiisalu teknikkikkut atortuutitut il.il. nalunaarsuineri pisariaqartumik ersarissuutitsinissaaq pitsaassutsikkullu pitsaasuutitsinissaaq, piginnittullu nalunaarutigisaannik nakkutiginnissalluni kommunalbestyrelsip qulakkiigassaraa. Illuutini Inissianillu Nalunaarsuiffimmi paasissutissat pissutsinut piviusunut naapertuutinningsut kommunalbestyrelsip malugippagu, paasissutissat nutarterneqarnissaat kommunalbestyrelsip isumagissavaa.

Imm. 3. Piginnittut nalunaarsuiffimmut nalunaarutaannik qanoq nakkutilliisoqarnissaannut Naalakkersuisut malittarisassanik aalajangersaasinnaapput.

§ 17 c. Pisortani oqartussaasoq alla imaluunniit ingerlatseqatigiiffik namminersortoq Illuutini Inissianillu Nalunaarsuiffimmi tamakkiisumik ilaannakortumilluunniit pilersitsinissaanik, ingerlatsinissaanik ineriartortitsinissaanillu Naalakkersuisut piginnaatissinnaavaat. Oqartussaasoq imaluunniit ingerlatsivik nalunaarsuiffimmi qanoq pilersitsinissaanut, ingerlatsinissaanut ineriartortitsinissaanullu Naalakkersuisut malittarisassanik aalajangersaassapput.

§ 17 d. Illuutini Inissianillu Nalunaarsuiffimmi paasissutissat tulluuttut nalunaarsorneqassapput:

- 1) sanaartukkat ataasiakkaat ilisarnaataat, ukioq sanaartorfusoq, inissisimaffia, angissuseq, ilusaa, atortorissaarutit, teknikkimut tunngasut, nukimmik pilersuutit atornerqarneralu, kiisalu
- 2) inissiat imaluunniit inuussutissarsiorfiit ataasiakkaat ilisarnaataat, ukioq sanaartorfusoq, angissuseq, ilusaa, atortorissaarutit, nukimmik pilersuutit atornerqarneralu.

Imm. 2. sanaartukkanut tunngasunik, sanaartukkanilu inissianut tunngasunik kiisalu teknikkikkut atortuutitut il.il. paasissutissanik allanik, pisortani oqartussat suliaannut pingaaruteqarsinnaasunik imaluunniit inuiaqatigiinnut allatigut soqutiginaateqartunik nalunaarsuisoqarnissaannik Naalakkersuisut malittarisassanik aalajangersaasinnaapput.

Imm. 3. Nalunaarsuinissami paasissutissat naammattut eqqortullu qulakkeerumallugit Naalakkersuisut kommunalbestyrelsilu paasissutissaasivinni allani paasissutissanik, Illuutini Inissianillu Nalunaarsuiffimmi paasissutissanut ataqatigiissitsinnaapput.

§ 17 e. Illuutini Inissianillu Nalunaarsuiffimmik ingerlatsinermi paasissutissanik atugassanik pisortani oqartussat kiisalu illunik, sanaartukkanik il.il. nalunaarsorneqarsimasunik piginnittuusut paasissutissanik paasissutissiisarnissaannut Naalakkersuisut malittarisassanik aalajangersaassapput.

Imm. 2. Naalagaaffeqatigiinnermi oqartussaasut isumaqatiginninniarfigereernerisigut, illuutit teknikkikkullu atortorissaarutit il.il. Kalaallit Nunaanni naalagaaffeqatigiinnermi oqartussaasunit atorneqartartut pillugit paasissutissanik nalunaarsuisarnissamik Naalakkersuisut immikkut ittunik malittarisassiorsinnaapput.

§ 17 f. Pisortani oqartussat Illuutini Inissianillu Nalunaarsuiffimmi takunnissinnaanerinit kiisalu Namminersorlutik Oqartussat ataanni pisortat ingerlatsinerinit, kommunillu Illuutini Inissianillu Nalunaarsuiffimmik atuisussaataanerinit Naalakkersuisut malittarisassanik aalajangersaassapput

Imm. 2. Illuutit, inissiat teknikkikkullu atortorissaarutit il.il. pillugit paasissutissanik nalunaarsorneqarsimasunik atuuttunik suliffeqarfiit namminersortut il.il. inuillu takunnissinnaanerinit, matumani paasissutissanik killilimmik takunnissinnaanermut, paasissutissanillu takunnissinnaanermut akiliutissat pillugit Naalakkersuisut malittarisassanik aalajangersaassapput.

Kapitali 4

Kommunimi akuersissuteqarneq

§ 18. Suliassamik suliaqarnermini inatsit manna aammalu maleruagassat inatsit tunngavigalugu aalajangersarneqartut malinneqarnersut kommunalbestyrelsiip nakkutigissavaa.

Imm. 2. Inatsit manna imaluunniit maleruagassat taaneqartut malillugit peqqussutit malinneqarnersut, aammalu akuersissutini imaluunniit immikkut ittunik akuersissutini piumasaqaatigineqartut malinneqarnersut kommunalbestyrelsiip nakkutigissavaa.

Imm. 3. Kommunalborgstyrelsiip unioqqutitsisoqartoq paasiguniuk, pineqartumi pissutsit pingaaruteqanngitsut pineqanngippata, inatsit malinneqarnissaat anguniassavaa.

Imm. 4. Akuersissummik pigisariaqartumik pissarseqqaarani sanaartukkap aallartinneqartup unitsinneqarnissaanik peqqussissuteqarneq § 23 malillugu maalaarutigineqarsinnaanngilaq, tamatumani suliaq siumoortumik akuersissuteqarfigineqartussatut pisariaqartitsiviunngitsoq pineqanngippat.

Eqqartuussivimmi aalajangiinertaqanngitsumik isersinnaaneq

§ 19. Sanaartukkami inatsimmik imaluunniit inatsit malillugu aalajangersakkanik suliarineqarsimasunik piumasaqaatinillu saqqummiunneqartunik unioqqutitsisoqarsimanersoq misissorniarlugu kommunalborgstyrelsi eqqartuussivimmi aalajangiinertaqanngitsumik sanaartukkamut isersinnaanissamik piumasaqarsinnaavoq.

Imm. 2. § 17 b malillugu nalunaarsuinnermut atugassanik paasissutissanik pissarsiniarluni sanaartukkap silataanik takusaanissaq uuttortaanissarlu siunertaralugit, kommunalborgstyrelsi eqqartuussivimmi aalajangiinertaqanngitsumik illunukarnissamik piumasaqarsinnaavoq. Paasissutissat piginnittup paasissutissiisutigissallugit pisussaaffigisaanni paasissutissanik annertuumik nikingasoqarneranik

pasitsaassaqarnermi, kommunalbestyrelsi illup iluanut alakkaaniarluni uuttortaaniarlunilu eqqartuussivimmi aalajangiinertalimmik illumukarsinnaavoq.

Imm. 3. Kommunip nakkutilliinermut sulisui piumaffigineqarnermikkut kinaassutsimut uppernarsaammik takutitsissapput.

§ 20. Inatsimmi tunngaviliineq naapertorlugu illuummut isernissamut, aammalu § 17 naapertorlugu assersuinissamut inuerutsitsinissamullu politiit kommunalbestyrelsimut ikiutissapput.

§ 21. Inatsit aammalu taanna tunngavigalugu aalajangersagaliarineqartut malillugit kommunalbestyrelsip aqutsinissaanut maleruagassat illuliornermi malittarisassani aalajangersarneqarsinnaapput.

Imm. 2. Aalajangersakkat sanaartukkanut maleruagassiarineqartut malillugit aqutsinermi kommunalbestyrelsip oqartussaasunut allanut suleqateqarnissaa pillugu aalajangersakkanik Naalakkersuisut aalajangersaasinnaapput.

Kapitali 5

Immikkut akuersissuteqarsinnaaneq

§ 22. Inatsimmi aalajangersakkanik aamma inatsit malillugu aalajangersarneqarsimasunik saneqqutsinissamut immikkut ittumik akuersissuteqartoqarsinnaavoq, tamanna eqqarsaatigisassanut aalajangersakkani pineqartuni tunngavigineqartunut naapertuuttutut naliliiffigineqarpat.

Imm. 2. § 8-mi maleruagassat aalajangersarneqartut saneqqunneqarnissaannut immikkut akuersissutit aatsaat nalunaarutigineqarsinnaapput, sumut immikkut akuerineqarnissamik qinnuteqartoqarnersoq pillugu aammalu sapaatip akunneri pingasut qaangiutsinnagit oqaaseqaatit kommunalbestyrelsimut nassiunneqarsinnaanerit pillugu kommunalbestyrelsip sanaartukkamut pineqartumut saniliusunut ilisimatitsissuteqareerneraniit sapaatit akunneri pingasut ingerlareerpata.

Imm. 3. Sanaartornermi suliassamut immikkut akuersissuteqarfiusumut ukiut marluk qaangiutsinnagit akuersissummik tunniussisoqanngippat, immikkut ittumik akuersissut atorunnaassaaq. Sanaartornermi suliassaq immikkut ittumik akuersissuteqarfusoq aallartinneqanngippat, immikkut ittumik akuersissut sanaartornerup aallartinnaasanut akuersissut ilanngullugu atorunnaassaaq, tak. § 13, imm. 1.

Imm. 4. Immikkut ittumik akuersissutit kommunalbestyrelsimut nalunaarutigineqassapput. Kommunilbestyrelsip immikkut ittumik akuersisarnermut oqartussaasutut sulinerat pillugu aalajangersakkanik Naalakkersuisut aalajangersaasinnaapput.

Kapitali 6

Maalaarutit

§ 23. Apeqqutitut inatsisinik tunngaveqartunut tunngatillugu pissutsinut inatsimmi matumani pineqartunut tunngatillugu kommunalbestyrelsip aalajangiineri, taamaattorli tak. § 18, imm. 4, Naalakkersuisunut maalaarutigineqarsinnaapput.

Imm. 2. Kommunilbestyrelsip aalajangiineri allat aqutsinermi oqartussaasunut allanut maalaarutigineqarsinnaanngillat. Imm. 1 naapertorlugu Naalakkersuisut aalajangiineri aqutsinermi oqartussaasunut allanut maalaarutigineqarsinnaanngillat.

Imm. 3. Suliap inernissaanut annertuumik soqutigisaqartut ataasiakkaat kikkulluunniit kommunalbestyrelsip aalajangiineri pillugit maalaaruteqarsinnaapput.

§ 24. Allamik aalajangiisoqarsimatinnagu ullormit aalajangiinerup tiguisussamut nalunaarutigineqarfianit sapaatit akunneri sisamat periarfissaritinneqarput.

Imm. 2. Kommunalbestyrelsip peqqussutaa pillugu maalaaruteqarneq naammassinninnginnissamut pisinnaatitaaffliinngilaq. Taamaattorli maalaarut kinguartitsinissamut tunngavigineqassanersoq maalaaruteqarnermut oqartussaasut aalajangersinnaavaat.

§ 25. Inatsit manna imaluunniit inatsit manna naapertorlugu peqqussusiaasimasut malillugit aqutsisoqarfimmi aalajangiinerit isummerfigitinniarlugit eqqartuussisulersuussinissat, ullormit aalajangiinerup pineqartumut nalunaarutigineqarfianit qaammatit arfinillit qaangiutsinnagit suliakkiissutigineqassapput.

Kapitali 7

Akuersissutit piffissamut killilikkat piunasaqaateqarfusullu

§ 26. Inatsit manna naapertorlugu kommunalbestyrelsip akuersissutaa atuukkallartussatut, imaluunniit sanaartugaq immikkut ittumik iluseqarpat, sananeqarpat, inissisimaffeqarpat allatulluunniit issuteqartumik piffissamut killiliiffigineqarnissaa pisariaqarpat piffissamut aalajangersimasumut atuuttussatut nalunaarutigineqarsinnaavoq.

Kapitali 8

Akitsutit

§ 27. Inatsit naapertorlugu kommunalbestyrelsip qinnuteqaatinik suliaqarnissaanut akitsuutissat pillugit Naalakkersuisut maleruagassiussapput.

Imm. 2. § 6, imm. 3 aamma § 11 naapertorlugu iliuusissanut aallartinneqartussanut akitsuutissat pillugit Naalakkersuisut maleruagassiorsinnaapput.

§ 28. Akitsuutit § 27-mi taaneqartut, aamma aningaasat kommunalbestyrelsip inatsit naapertorlugu siumoortumik naatsorsorsimasai illuutip qularnaveeqqusiissutigineqarneratigut akilersinniarneqarsinnaapput.

Imm. 2. Aamma akitsuutit aammalu imm. 1-imi aningaasartaliussat akilernerqanngitsut pisortanut akiitsut akilernerqanngitsut akilersinniarneqarnerat pinngitsoortinniarneqarnerallu pillugit Inatsisartut inatsisaanni maleruagassat naapertorlugit akissarsianik il.il. ilanngaassisarnikkut akilersinniarneqarsinnaapput.

Kapitali 9

Pineqaatissiissutaasinnaasut

§ 29. Akiliisussanngorluni pineqaatissinneqarsinnaavoq,:

1) inatsisini maleruagassat imaluunniit inatsit tunngavigalugu peqqussutit suliarineqartut malillugit akuersissummik piniaqqaarani sanaartugassanik aallartitsisoq, sanaartukkamik atuilersoq imaluunniit iliuusissanik allanik aallartitsisoq, imaluunniit iliuusissanik allanik, oqartussaasumit pineqartumit akuerineqartumit allaanerumik iliorluni siumoortumik akuersissummik piniaqqaarluni suliarineqartussamik aallartitsisoq,

2) piumasaqaatinik inatsit malillugu akuersissummi aalajangersarneqartunik, imaluunniit inatsit naapertorlugu aalajangersakkanik suliarineqartunik unioqqutitsisoq,

3) inatsit malillugu akuersissummi aalajangersarneqartut, imaluunniit inatsit naapertorlugu aalajangersakkanik suliarineqartut naapertorlugit peqqussummik imaluunniit inerteqqummik naammassinninngitsoq, imaluunniit

4) aserfallatsaaliuinissamik, sanaartukkami najugaqartut allallu ulorianartorsiulernissaannut pinngitsuuinarluni pisariaqartinneqartumik suliaqanngitsoortoq.

Imm. 2. Peqqussutini aalajangersakkanik unioqqutitsineq akiliisussanngortitsinermik kinguneqassanersoq, inatsit malillugu peqqussutini aalajangersarneqarsinnaavoq.

Imm. 3. Sanaartukkap suliarineqarnerani inatsisit malinneqarsimangippata, sanaartukkamik isumaginnittuusooq imaluunniit suliaqartoq akiliisussanngortinneqarsinnaavoq, pissutsillu malillugit marluullutik akiliisussanngortinneqarsinnaapput. Suliassamik isumaginnittussanngortitsisoq taamaallaat akisussaatinneqarsinnaavoq, akiliisussanngortitsinermi akisussaatinneqartussamik allamik taasisinnaanngippat, imaluunniit pineqartup inatsisinut uniuuttuuneranik ilisimannilluni pasitsaassaqarsimalluniluunniit suleqataasimappat. Pissutsit malillugit inuit imm. 1-mi taaneqartut akisussaatinneqarsinnaapput.

Imm. 4. Inatsimmi imaluunniit peqqussutini inatsit malillugu aalajangersarneqartuni akiliisussanngortitsinissaq tunngavissaqarpat, pisinnaatitaallunilu pisussaataasooq Kalaallit Nunaanni pinerluttulerinermut inatsimmi maleruagassat malillugit akiliisussanngortinneqarsinnaavoq.

Imm. 5. Inatsit manna imaluunniit inatsit manna naapertorlugu peqqussutigineqartut malillugit akiligassanngortinneqartut Nunap Karsianut tutsinneqassapput.

Kapitali 10

Atuutilerfia

§ 30. Inatsisartut inatsisaat 1. juli 2010 aallarnerfigalugu atuutilerpoq.

Imm. 2. Tamatuma peqatigisaanik pilersaarusionerq aamma nunaminertat atorineqartarnerat pillugit Inatsisartut peqqussutaanni nr. 11-mi, 5. december 2008-meersumi §§ 33, 34 aamma 35 atorunnaarsinneqarput.

Imm. 3. Inatsisartut peqqussutaat imm. 2-mi taaneqartoq naapertorlugu maleruagassat piumasaqaatillu inatsimmi matumani maleruagassat aalajangersarneqartut tunngavigalugit taarserneqarnissamik atorunnaarsinneqarnissamillu tungaanut atuutiinnarallassapput.

§ 31. Pituffimmi sakkutooqarfik inatsimmut matumunnga ilaatinneqanngilaq.

Inatsisartut inatsisaata nr. 29, 13. juni 2023-imeersup (Sanaartukkani piusuni nukimmik sipaarniarluni aaqqissuussinerit kiisalu nuna tamakkerlugu Illuutini Inissianillu Nalunaarsuiffimmik IIN-imik pilersitsinissamut Naalakkersuisunut piginnaatitsisut) ^[i] atuutsitsilernissamut aalajangersagaq una imaraa:

§ 3

Inatsisartut inatsisaat manna 2023-mi juulip aallaqqaataani atuutilissaaq.

Imm. 2. Kalaallit Nunaanni illunik inissianillu nalunaarsuisarneq pillugu GTO-mit kaajallaasitaq nr. 2.088 12. marts 1987-imeersoq, Sanaartorneq pillugu Inatsisartut inatsisaat naapertorlugu malittarisassatigut aalajangersarneqarluni allanngortinneqarnissaata imaluunniit atorunnaarsinneqarnissaata tungaanut atuutiinnassaaq.

Ineqarnermut Attaveqaasersuutinullu Naalakkersuisoqarfik, ulloq 13. november 2023

Ruth Lindhardt (atsior.)

Naalakkersuisoqarfimmi pisortaaq

/ Embla Kristjánsdóttir (atsior.)

^[i] Inatsimmi allannguutit ukuupput § 1, § 2, imm. 1, §§ 17 a-f, § 19, imm. 2-3, § 20, § 27 imm. 2.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat
Naalakkersuisut